

Jeremy Miles AC/AM
Y Cwnsler Cyffredinol a Gweinidog Brexit
Counsel General and Brexit Minister



Llywodraeth Cymru
Welsh Government

David Rees AM
Chair of the External Affairs and Legislation Committee
National Assembly for Wales
Cardiff Bay
CF99 1NA

14 Chwefror 2020

Annwyl David,

Diolch am eich llythyr dyddiedig 6 Chwefror, pan ofynnoch am wybodaeth bellach yn dilyn y sesiwn graffu ar 27 Ionawr 2020.

Gallaf gadarnhau bod swyddogion Llywodraeth Cymru wedi rhannu'r dogfen gan Lywodraeth Cymru, *Y Berthynas rhwng y DU a'r UE yn y Dyfodol: Blaenoriaethau Negodi i Gymru* gyda'u cysylltiadau yn yr UE, gan gynnwys Cabinetau Llywydd y Comisiwn Ewropeaidd, Ursula von der Leyen a Chomisiynydd Masnach Ewrop, Phil Hogan, yn ogystal â gyda Michel Barnier. Anfonwyd copi hefyd at UKRep (bellach UK Mission to the EU, Brussels).

Gan fod amser yn brin yn ystod y cyfarfod, ni lwyddwyd i drafod cwestiynau yr oedd y Pwyllgor yn dymuno eu trafod ynghylch fy ymateb i adroddiad y Pwyllgor ar newidiadau i'r rhyddid i symud ar ôl ymadael â'r UE a byddaf yn trafod y materion hyn yn llythyr hwn.

Gofynnoch am ragor o wybodaeth am yr "uwchgynhadledd ar faterion yn ymwneud â fisâu", yr wyf yn cyfeirio ati yn fy ymateb. Mae'r uwchgynhadledd ryngwladol sy'n sôn am fisâu ar gyfer gwyliau yn cael ei chynnal ar 27 Chwefror yng Nghaeredin. Nod yr uwchgynhadledd a'r gweithdy yw datblygu atebion ymarferol er mwyn goresgyn y rhwystrau sy'n wynebu amrywiol wyliau ar draws y DU. Bydd yn gyfle i ymgysylltu â rhanddeiliaid o bob cwr o'r DU, yn ogystal â Gweinidogion a swyddogion o'r Gweinyddiaethau Datganoledig. Cafodd Llywodraeth Cymru ei chynnwys ar y rhestr o wahoddedigion, ac felly bydd gan Gymru gynrychiolaeth briodol yn y digwyddiad.

Mewn perthynas â'r trefniadau a fydd ar waith ar gyfer cyd-gydnabod cymwysterau hyfforddiant ac addysg feddygol ar ddiwedd y cyfnod pontio, gofynnoch am wybodaeth am y

Bae Caerdydd • Cardiff Bay
Caerdydd • Cardiff
CF99 1NA

Canolfan Cyswllt Cyntaf / First Point of Contact Centre:
0300 0604400

YPCCGB@llyw.cymru / PSCGBM@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

trefniadau cyfatebol ar gyfer gweithwyr iechyd y DU sy'n gweithio yn un o'r 27 o wladwriaethau'r UE. Mae hyn, wrth gwrs, yn fater pwysig iawn, ond ar hyn o bryd nid oes gennym unrhyw sicrwydd beth fydd y sefyllfa ar ddiwedd y cyfnod pontio. Fodd bynnag, rydym yn croesawu'r awydd y mae'r DU a'r UE yn ei rannu i gytuno ar system gynhwysfawr a chyfatebol i gydnabod cymwysterau proffesiynol ar ôl ymadael â'r UE. Mae Llywodraeth Cymru yn ymgysylltu'n rheolaidd gyda Llywodraeth y DU i sicrhau bod manylion yn cael eu datblygu.

Mae Adrannau Llywodraeth y DU hefyd yn gweithio'n agos gyda'i gilydd i sicrhau nad yw unrhyw gydnabyddiaeth gilyddol o systemau cymwysterau a gaiff eu negodi gyda'r UE ar ôl ymadael yn creu rhwystrau artiffisial ac yn tansilio ei gilydd.

Gofynnoch hefyd am ddiweddariad ar yr amserlen arfaethedig ar gyfer cyhoeddi Cynllun Cydlyniant Cymunedol newydd. Ar hyn o bryd, mae Llywodraeth Cymru yn ystyried y dull gorau o amlinellu ein blaenoriaethau ynghylch cydlyniant cymunedol yng Nghymru. Mae'r Dirprwy Weinidog a'r Prif Chwip yn disgwyl cyhoeddi Cynllun Cydraddoldeb Strategol Llywodraeth Cymru ar gyfer 2020-2024 ar 31 Mawrth eleni, ac ynddo ceir amcan penodol ar gydlyniant cymunedol, ac rydym wrthi'n ystyried ar hyn o bryd sut y dylai strategaeth ar gydlyniant cymunedol fod yn gysylltiedig â'r Cynllun Cydraddoldeb Strategol newydd.

Yn olaf, gofynnoch am wybodaeth y mae Llywodraeth Cymru wedi'i derbyn gan Lywodraeth y DU ar yr effaith y mae Ffioedd Sgiliau Mewnfudwyr wedi'i chael ar gyflogwyr Cymru. Cyflwynwyd y Ffioedd hyn ym mis Ebrill 2017 fel rhan o'r gyfres o newidiadau fisa a gyflwynwyd o dan Ddeddf Mewnfudo 2016. Mae'n ei gwneud yn ofynnol i gyflogwyr sy'n cefnogi gweithiwr ar fisa Haen 2 dalu ffi ychwanegol, gorfodol o £1000, neu £364 i gwmnïau bach a noddwyr elusennol.

Ni pharatowyd asesiad o effaith ar gyfer Rheoliadau Ffioedd Sgiliau Mewnfudwyr 2017, gan fod Llywodraeth y DU yn cyfrif bod y ffi hon yn dreth, ac felly ei bod y tu hwnt i gwmpas y Fframwaith Rheoliadau Gwell. Mae Llywodraeth Cymru wedi codi'r mater o gostau ariannol a beichiau gweinyddol fisâu Haen 2 gyda'r Swyddfa Gartref dro ar ôl tro, ond yn anffodus nid ydym wedi cael unrhyw eglurhad am ba effaith y bydd y Ffioedd Sgiliau Mewnfudwyr yn ei chael ar fusnesau.

Yn gywir,



Jeremy Miles AC

Y Cwnsler Cyffredinol a Gweinidog Brexit
Counsel General and Brexit Minister